



ՀԵՐԹԱԿԱՆ ԱՏԵՍՏԱՎՈՐՄԱՆ ԵՆԹԱԿԱ ՈՒՍՈՒՑԻՉՆԵՐԻ  
ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐ

## ՀԵՏԱԶՈՏԱԿԱՆ ԱՇԽԱՏԱՆՔ

Մասնագիտություն ՏԵԽՆՈԼՈԳԻԱ

Թեմա «Տեխնոլոգիա» առարկայի «Կարպետագործություն» թեմայի  
դասավանդման մեթոդիկան 6-րդ դասարանում

Կատարող Հակոբյան Արմինե Արսենի  
Ազգանուն, անուն, հայրանուն

Ղեկավար տեխ. գիտ. թեկն. դոցենտ Նունե Օրդյան  
Ազգանուն, անուն, գիտական աստիճան, կոչու

## Բովանդակություն

Ներածություն .....	3
Մաս 1. Հանրակրթության նոր չափորոշչով սահմանված «Մշակույթային կարողունակությունը».....	4
Մաս 2. Կարպետագործության տեղը հայկական մշակույթում .....	7
2.1. Պատմական ակնարկ կարպետագործության մասին .....	7
2.2. Կարպետագործության նյութերն ու գործիքները .....	8
2.3. Կարպետ հինելը.....	11
Մաս 3. «Կարպետագործություն» թեմայի դասի պլան.....	13
Եզրակացություններ և առաջարկություններ .....	15
Օգտագործված գրականության ցանկ .....	16

## Ներածություն

2021թ. փետրվարի 4-ին Կառավարությունը հաստատեց հանրակրթության նոր չափորոշիչը<sup>1</sup>: Հանրակրթության նոր չափորոշիչն իր սկզբունքային մոտեցումներով, կառուցվածքով և բովանդակությամբ տարբերվում է նախկինից: Ամբողջ փաստաթղթի հիմքում ընկած է կարողունակությունների (կոմպետենցիաների) վրա հիմնված կրթության բովանդակության կառուցման մոտեցումը, ինչը համահունչ է աշխարհի շատ երկրների կրթական համակարգերի զարգացման ժամանակակից միտումներին: Չափորոշչով որպես գերազույն նպատակ սահմանվել է 8 առանցքային կարողունակությունների ձևավորումը: Նոր չափորոշիչի գլխավոր նորությունն այն է, որ այն կրթության բովանդակության կառուցման առարկայական մոդելից անցում է ապահովում կարողունակությունների վրա հիմնված կրթական մոդելի:

**Իմ հետազոտական աշխատանքի նպատակն է** հետազոտել «Տեխնոլոգիա» առարկայի «Կարպետագործություն» թեմայի դասավանդման առանձնահատկությունները հանրակրթական դպրոցի 6-րդ դասարանում և վեր հանել դրա ազդեցությունը սովորողների մշակույթային կարողունակության ձևավորման վրա:

### **Խնդիրներն են՝**

1. Վերլուծել և ուսումնասիրել կարպետագործության պատմությունը:
2. Վերլուծել «Տեխնոլոգիա» առարկայի 6-րդ դասարանի դասագրքի «Կարպետագործություն» թեման և դասավանդման առանձնահատկությունները:
3. Հետազոտել «Կարպետագործություն» թեմայի ազդեցությունը սովորողների մշակույթային կարողունակության ձևավորման վրա:

---

<sup>1</sup> <https://www.arlis.am/documentview.aspx?docid=149788>

## Մաս 1. Հանրակրթության նոր չափորոշով սահմանված «Մշակութային կարողունակությունը»

Ի՞նչ է կարողունակությունը: Կարողունակությունը անհատի ինտեգրալային, համալիր բնութագրիչ է. այն գիտելիքների, հմտությունների, դիրքորոշումների և արժեքների համակարգ է, որը թույլ է տալիս այս կամ այն ոլորտում հաջողությամբ լուծելու որոշակի խնդիրներ: Համաձայն այս սահմանման՝ եթե որևէ մեկը հավակնում է կարողունակ լինել որևէ բնագավառում, ապա նա պետք է տիրապետի այդ բնագավառին բնորոշ որոշակի գիտելիքների, հմուտ լինի այդ բնագավառում որոշակի գործունեություն ծավալելու, պետք է ունենա արժեքային որոշակի համակարգ և կարողանա իր դիրքորոշումն արտահայտել այդ բնագավառի որոշակի հարցադրումների, երևույթների վերաբերյալ: Կարողունակությունը նշված բոլոր չորս որակների համատեղ առկայությունն է, և դրանցից որևէ մեկի բացակայությունը թույլ չի տալիս սովորողին կամ քաղաքացուն հաջողությամբ լուծելու իր առջև ծառայած խնդիրները<sup>2</sup>:

Ընդունված է համարել, որ կարողունակությունների վրա հիմնված մոտեցումը ծնունդ է առել ԱՄՆ-ում անցյալ դարի 50-60-ական թվականներին, երբ անհրաժեշտություն էր առաջացել որոշելու ծառայողների աշխատանքի արդյունավետության չափանիշները:

Մեր չափորոշում ձևակերպվել են հետևյալ 8 առանցքային կարողունակությունները.

- լեզվական կարողունակություն և գրագիտություն,
- սովորել սովորելու կարողունակություն,
- ինքնաձանաչողական և սոցիալական կարողունակություն,
- ժողովրդավարական և քաղաքացիական կարողունակություն,
- թվային և մեդիա կարողունակություն,
- մշակութային կարողունակություն,
- մաթեմատիկական և գիտատեխնիկական կարողունակություն,
- տնտեսական կարողունակություն:

Մշակութային կարողունակությունը ՀՊԶ-ում սահմանված է հետևյալ կերպ.

---

<sup>2</sup> [Հանրակրթության պետական նոր չափորոշիչը \(նոր մոտեցումներ, հեռանկարներ\)](#)

[Գ. Մելիքյան,](#)

«սովորողները ճանաչում են հայ մշակույթն ու մարդկային քաղաքակրթությունների մշակութային բաղադրիչները՝ որպես մարդկային զգացմունքների և գործողությունների կողմնորոշիչներ: Նրանք արժևորում են սեփական ինքնությունը, ընտանիքի, համայնքի և պետության դերը, ունեն Հայաստանի աշխարհագրության, հասարակական-քաղաքական համակարգի և պատմության հիմնարար իմացություն: Մշակերտները ձևավորում են սեփական նախասիրություններ ազգային և համաշխարհային մշակութային ժամանակաշրջանների ուսումնասիրության ընթացքում: Նրանք ի վիճակի են զարգացնել սեփական մշակութային ու գեղագիտական պատկերացումները՝ արժևորելով հոգևոր և նյութական ժառանգությունն ու մշակութային բազմազանությունը, ճանաչելով հայ և համաշխարհային գրականությունն ու արվեստը և ձևավորելով մշակութային գրագիտություն և ճաշակ»:

Մշակութային կարողունակության նկարագրիչներն են.

### **Գիտելիք՝**

- Ստեղծագործական տարբեր ժանրեր և ոճեր:
- Տարբեր ժամանակաշրջանների, ազգերի և մշակութային-գաղափարային խմբերի արժեքները, դրանց ազդեցությունն ու արտացոլումը տեղական և համաշխարհային մշակույթում:
- Ազգային մշակույթը, նյութական և ոչ նյութական ժառանգությունը, դրա առանձնահատկությունները և ներդրումը համաշխարհային մշակույթում:
- Տարբեր ժամանակաշրջանների հասարակական, տնտեսական, քաղաքական և մշակութային զարգացումների փոխկապակցվածությունը:
- Տարբեր կրոնական ավանդույթներում առկա ընդհանրություններն ու տարբերությունները:
- Տարբեր մշակույթներ, մասնավորապես՝ արժեքներ, սովորույթներ և հմտություններ, որոնք հատուկ են այդ մշակույթներին:

### **Հմտություններ**

- Արվեստի որոշ տեսակներում կատարել ստեղծագործական աշխատանքներ:
- Արվեստի միջոցով ստեղծագործաբար արտահայտել սեփական գաղափարները:
- Մշակել և իրականացնել մշակութային նախագծեր:
- Քննադատաբար անդրադառնալ իր սեփական աշխարհայացքին՝ որպես բազմաթիվ աշխարհայացքներից մեկին:
- Քննադատաբար անդրադառնալ, թե ժամանակի ընթացքում ինչպես է գաղափարը զարգացել տարբեր մշակույթներում տարբեր ձևերով:

- Հարմարվել տարբեր մշակութային պատկանելիություն ունեցող անձնանց հանդիպելիս և շփվելիս:
- Վերլուծել այլ մշակույթներում առկա տարբեր տեսակետներ:
- Արտահայտել, հիմնավորել և պաշտպանել սեփական տեսակետը և դիրքորոշումը:

### **Վերաբերմունք**

- Արտահայտել կամ վիճարկել սեփական գաղափարները և արժեքները:
- Ցուցաբերել հարգանք և հետաքրքրություն տարբեր մշակույթների նկատմամբ:
- Փնտրել ընդհանուր եզրեր իրենից գաղափարապես և արժեքային համակարգով տարբեր մարդկանց հետ քննարկումներ իրականացնելիս:
- Արտահայտել հետաքրքրասիրություն այլ հավատալիքների, մեկնաբանությունների և մշակութային այլ կողմնորոշումների ու պատկանելիության նկատմամբ:
- Ցուցաբերել տարբեր մշակութային պատկանելիություն ունեցող մարդկանց հետ աշխատելու հետաքրքրություն:
- Ողջունել տարբեր արժեքներ, սովորույթներ և վարքագիծ ունեցող մարդկանց հանդիպելու հնարավորությունները:
- Կարևորել իր՝ հայկական և համաշխարհային պատմամշակութային արժեքների ժառանգորդ լինելը և ցուցաբերել պատասխանատու վերաբերմունք դրանց պահպանման գործում:

### **Արժեք**

- Մշակութային ընկալում և արժևորում:
- Արտահայտել այն կարծիքը, որ հասարակության մեջ մշակութային տարբերությունը պետք է դրականորեն արժևորվի և գնահատվի:
- Արժևորել միջմշակութային երկխոսությունը:
- Ներկայացնել հայ մշակույթի տեղն ու դերը համաշխարհային մշակույթում և համաշխարհային մշակույթի դերը համամարդկային արժեքների համատեքստում:

## Մաս 2. Կարպետագործության տեղը հայկական մշակույթում

### 2.1. Պատմական ակնարկ կարպետագործության մասին

Հայկական մշակույթի մեջ առանձնահատուկ տեղ են զբաղեցնում գորգագործությունը և կարպետագործությունը: Գորգերը և կարպետները հայ հանճարեղ ու արարող մտքի գեղարվեստական խորհրդանիշն են, որոնց վրա դրոշմված են ազգային ու համամարդկային ճաշակը, գեղեցիկի նուրբ զգացողությունը, հայ ժողովրդի պատմությունը, կենսափիլիսոփայությունը, արարող ձեռքի ճկուն իմաստությունը: Գորգերը և կարպետները հայ ժողովրդի ինքնատիպ մշակույթի լավագույն դրսևորումներից են, որոնք համարժեք են քանդակագործությանը և մանրանկարչությանը: Կարպետն ու գորգը հայ ժողովրդի կենցաղում հնուց ի վեր եղել և մնում են կենսական անհրաժեշտություն: Այդ գործվածքները ոչ միայն կիրառական արժեք են ունեցել, այլև եղել են ինքնաարտահայտման միջոց: Հայ գորգագործը գորգը հյուսել է որպես իր օջախի ամենաթանկ և փայփայած իր, այն դարձրել սրբացած տոհմանշան: Ավանդական գեղեցիկ ուրվագծերը, ինքնատիպ զարդանախշերը, դրանց պաճուճական միահյուսությունները ձեռագործ գորգերի վարպետների վառ երևակայության ակնառու վկայությունն են: Հայերենում «գորգ» և «կարպետ» բառերն օգտագործվում են որպես հոմանիշ բառեր՝ միայն այն տարբերությամբ, որ գորգերն ունենում են թելախավ, իսկ կարպետները՝ ոչ: «Գորգ» բառն առաջին անգամ հիշատակվում է Տավուշի Կապտավանք եկեղեցու պատին եղած արձանագրություններից մեկում (1242-1243թթ.): Հայագետներ Ղափանցյանն ու Ձահուկյանը գտնում են, որ «գորգ» բառը պատկանում է խեթերենի բառաֆոնդին, ուր և հիշատակվում է «kurka» ձևով: Ակադեմիկոս Հովսեփ Օրբելին ուղղակիորեն գրում է, որ «գորգ» բառը հայկական ծագում ունի և նշանակում է «նախշ»: «Կարպետ» բառն առաջին անգամ հիշատակվում է 5-րդ դարի Ավետարանում գրաբարյան «կապերտ» ձևով: Հայաստանում կարպետագործությունը իբրև արհեստ զարգացած է եղել դեռևս վաղնջական ժամանակներից: Վաղ շրջանում դրանք գործվել են դազգահների վրա՝ ձեռքով, մանուֆակտուրայի զարգացման հետ սկսեցին գործվել հաստոցներով: Պատմական Հայաստանում գորգերն ու կարպետները համարվել են առաջին անհրաժեշտության իրեր, դրանք մեծ պահանջարկ են ունեցել կենցաղում՝ պատրաստել են գոգնոցներ, գլխարկներ, խուրջիներ և այլն: Այս արհեստն այնքան սերտ էր

կապված առօրյա կյանքի հետ, որ այն իմանալը պարտադիր էր: Գրեթե բոլոր բնակավայրերում գործում էին կարպետներ՝ քիլիմներ, ծածկոցներ, վարագույրներ, թամբեր, խուրջիններ, վերմակներ, աղի տոպրակներ, ձիու ծածկոցներ և այլն: Կենցաղային նշանակությունից զատ, գորգերը և կարպետները օգտագործել են ցրտից պաշտպանվելու նպատակով՝ փռել են հատակին, թախտին, աստիճաններին ու միջանցքներում, փակցրել մահճակալներին կից պատին, որպեսզի ընտանիքի անդամը քնած ժամանակ չհենվի պատին:

## **2.2. Կարպետագործության նյութերն ու գործիքները**

Իր գոյության հազարամյակների ընթացքում մարդկությունը թելեր ու գործիքներ է հյուսել թե՛ կենդանական՝ բուրդ, մետաքս, և թե՛ բուսական՝ բամբակ, վուշ, ծագում ունեցող հումքից: Հայկական լեռնաշխարհում կային կարպետագործության զարգացման համար անհրաժեշտ բոլոր նպաստավոր պայմանները՝ բուրդը, բամբակը, վուշը, մետաքսը, դրանք մշակելու և օգտագործելու կուլտուրան:

Ինչպես անցյալում, այնպես էլ ներկայում, կարպետագործների և գորգագործների հիմնական աշխատանքային գործիքներն էին՝ տորքը (դագգահ), մկրատը, կտուտը, դանակը և փոքրսանրը, իսկ հումքի վերամշակման համար՝ սանդերքը, անեղը, ճախարակը և իլիկը: Այդ գործիքները ժամանակի ընթացքում ավելի ու ավելի են հղկվել, կատարելագործվել: Օրինակ՝ գորգագործական տորքը միշտ չէ, որ այժմյան ուղղահայաց ձևն է ունեցել: Սկզբում այն եղել է հորիզոնական, որը կոչվում էր «գետնագործ» կամ «տափի գործ»: Կարպետագործության համար օգտագործվել է ոչխարի, ուղտի բուրդ, բամբակ, մետաքս:

Այժմ էլ օգտագործվում են նույն թելերը, դրանք ներկվում են հատուկ ներկանյութերով, որոնք երկար տարիներ պահպանում են իրենց գույնը: Դեղին գույնը ստանում են թթի ծառի թեփից, շագանակագույնը՝ ընկույզի կեղևից, բաց շագանակագույնը/օխրա/՝ նռան կեղևից, կաթնագույնը՝ անթառամ ծաղիկից, կարմիրը՝ տորոնի արմատից, կապույտը՝ ինդիգո բույսից, որը ներկրվում է Հնդկաստանից: Գույնը ամրացնելու համար օգտագործում են շիբ և գինեքար: Այս գույների խառնուրդներից ստանում են մոտ վեցհարյուր երանգ:



Հազարամյակներ շարունակ կարմիր ներկը ստացել են որդան կարմիրի միջատից: Հայկական որդան կարմիրից ստանում էին բոլոր երանգները, սակայն այն հատկապես գնահատվում էր հազեցած կարմիրի և գույնի կայունության համար: Որդան կարմիրի միջատներին անվանում էին արքայական ծիրանի , քանի որ դրանով ներկում էին արքաների գորգերը: «Մեզերյան կարպետ» թանգարանում պահպանվել է գորգ, որի մի մասը տարիներ առաջ վերանորոգվել է քիմիական գունանյութերով ներկված թելերով և տարիներ հետո այդ թելերի գույները խամրել են, իսկ ավելի հնում գործած բնական գույնով ներկված գորգի մյուս մասի գույները պահպանվել են:

Գորգագործության և կարպետագործության գործընթացում օգտագործվում են տարատեսակ գործիքներ և սարքավորումներ: Դրանք ժամանակի ընթացքում քիչ են ենթարկվել փոփոխության: Ժամանակակից սարքավորումները, նույնիսկ դրանց փոքր տեսակները հիշեցնում են հնում օգտագործվող դազգահները:

Տորք (ոստան, հանա) գորգ գործելու մի մեծ սարք է, որի պատկերը հայտնի է 14-րդ դարից: Հայաստանում մինչև XIX դարի 70-ականթվականները համարյա շատ չնչին փոփոխություններով օգտագործվում էր ուղղահայաց սեպավոր հին տորքը:

Կտուտիչ /թելատու, կոթիչ, հովա, քարկիթ/ շարքերը նստեցնելու, կտուտելու բազմատամ գործիք է: Կարճ ու կորավուն կոթով բռնակ և ատամնաշարով ավարտվող հարվածող մաս /գլուխ/ ունեցող գործիք է, որի հարվածող մասը լինում է պայտաձև, լինում է փայտից, ոսկրից, մետաղից: Գործիքի կոթից բռնելով՝ գործողը խփում, նստեցնում է գործվածքի շարքերը:

Մկրատ՝ խավը խուզելու և հավասարեցնելու գործիք է՝ գույգ միասայր շեղբերով և բռնակներով: Գործվածքի խավն անհրաժեշտ չափով խուզելու համար գորգագործը մկրատի շեղբին և տակդիրի միջև տեղադրում է համապատասխան բարձրության ներդիրներ, պտուտակներով ձգումամրացնում է դրանք, ապա մի ձեռքով բռնում է բռնակներից, իսկ մյուսով՝ շեղբի ելուստներից և խուզում խավը:

Մանր՝ խավը սանրելու և մաքրելու գործիք: Այն 20-30 սմ երկարությամբ և 3-4 սմ լայնությամբ հարթ, բարակ թիթեղ է, որի մի եզրը կարճ ատամնաշարով է: Լինում է ոսկրից և մետաղից: Մինչև խավավոր գործվածքի խավիխուզումը այն սանրումուղղում են և ապասանրում-մաքրում ավելորդ թելերից:

Դանակ՝ գործվող թելը հանգուցելու և կտրելու գործիք: Այն կազմված է շեղբից և կոթից: Շեղբը մետաղից է, միասայր՝ ծայրը եռանկյունաձև կտրվածքով: Կոթը լինում է փայտից կամ մետաղից: Գործող թելը դանակի օգնությամբ հենքաթելեր արանքով անցկացնելով՝ հանգույց են կապում և թելի ավելացած մասը կտրում:

Կարպետագործության և գորգագործության հաջողությունը մեծապես կախված է նաև նյութի մշակման որակից: Օրինակ՝ բուրդը մշակելու համար մեր նախնիները ստեղծել են բազաթիվ գործիքներ և սարքավորումներ:

Թակ՝ բուրդ ձեծելու և լվանալու հարմարանք է: 70-80 սմ երկարությամբ, 10-12սմ լայնությամբ և 4-5 սմ հաստությամբ կորավուն փայտ է: Մի ծայրը բարակեցված է, գլանաձև՝ բռնելու համար: Բուրդը փռում են սալքարին, ջուր լցնում վրան և թակով խփում մինչև մաքվելը:

Սանդերք՝ զգել-սանրելու գործիք է: Այն բաղկացած է փայտե հարթակից, որին ամրացված է 2 միատիպ տախտակ՝ կազմելով եռանկյուն բուրգ: Դրանց զազաթները ամրացվում են ուղղահայաց, հավասար ու սրածայր պողպատե ճաղով, որոնցով ստացվում է սանրաձև 2ճաղաշար: Գործիքի փայտե զազաթն ունենում է մետաղյա ամրագոտի:

Իլիկ /թեշիկ, քարմա/ թելմանելու և ոլորելու գործիք: Հումքը մանելուորելու կամ թելը ոլորելու համար մանողը դրա ծայրն ամրացնում է կեռիկից, մի ձեռքով պահում բարակեցված թելահումքի կամ թելի հատվածը, մյուս ձեռքի մատներով կամ ազդրի և ձեռքի ափի շփումով պտտեցնում է իլիկը, ոլորում մյուս ձեռքի ափում բռնած հատվածը և մանած թելը փաթաթում իլիկի ձողին՝ մինչև մալանչի ավարտը:

Ճախարակ՝ թելահումքը մանելու և ոլորելու կամ թելը ոլորելու կատարելագործված հարմարանք: Այն կազմված է փայտե պատվանդան-հիմքից, որի միծայրին՝ զույգ հենաթևերի վերնամասի անցքերում, տեղադրված է առանցքաձողով թափանիվը: Թելահումքի մալանչի ծայրը բարակեցվում և կապվում է իլիկից: Թափանիվը աջ ձեռքով պտտելով՝ կատարվում է մալանչիմանումը՝ մինչև թելը անհրաժեշտ հաստության հասցնելը՝ ձախ ձեռքով պահելով այն պտտվող իլիկի ուղղությամբ: Մանված-ոլորված թելի դիրքն իլիկի հանդեպ փոխելով՝ փաթաթում են այն, որով ստացվում է ոստ:

## 2.3. Կարպետ հինելը

### Կարպետ գործելու քայլաշարք.

1. Կարպետ հինելը:
2. Հենքաթելի ամրացումը շրջանակի վրա:
3. Հավասարեցնող շղթայի հյուսումը:
4. Հենքաթելերի բաժանումը:
5. Միջնաթելերի անցկացումը:
6. Զարդանախշի և թելերի ընտրությունը:
7. Կարպետի հյուսումն ըստ էսքիզի:
8. Կարպետի վերջնական մշակում:

### Կարպետ հինելը

Սովորաբար այսօր կարպետ հինում են դազգահի կամ շրջանակի վրա՝ հատուկ հենքի համար նախատեված ոլորած թելը դազգահի կամ շրջանակի շուրջը փաթաթելով:

Գոյություն ունի նաև մեկ այլ ձև. շրջանակի վրա որոշ հեռավորությամբ մեխեր են խփում, այնուհետև թելը փաթաթվում է այդ մեխերի վրա: Հենքի համար կարևոր նշանակություն ունի հենքի խտությունը՝ կախված հենքի թելի հաստությունից (օրինակ՝ 10սմ-ի վրա 30-40 թել):

### Միջնաթելերի անցկացում

Միջնաթել անցկացնում ենք հիմնականում գորգ կամ գոբելեն գործելիս, քանի որ կարպետը ավելը պարզ գործվածք է, միջնաթել անցկացնելու կարիքը չկա:

### Հավասարեցնող շղթայի հյուսում

Շրջանակը կամ դազգահը հինելուց հետո հյուսում ենք ամրացնող շղթան. դրա համար մեզ անհրաժեշտ է վերցնել մի որևէ ամուր, հարթ, ուղղանկյուն առարկա (կլիների դա փայտից կամ ստվարաթղթից) և մեկումեջ անցկացնել հենքի թելերի միջով: Մինչև վերջ անցկացնելուց հետո, փայտը կամ ստվարաթուղթը, իջեցնում ենք ներքև՝ մինչև հավի շրջանակի փայտին: Այնուհետև վերցնում ենք հենքի թելից և սկսում գործել հավասարեցնող շղթան՝ ձախից աջ:

### Զարդանախշի և թելերի ընտրություն

Ըստ նախապես ընտրված զարդանախշի, ընտրում ենք թելերի գույներն այնպես, որ արտահայտվեն նախշի բոլոր արանձնահատկությունները: Ընտրում ենք գույն ֆոնի համար

(հիմնականում մուգ կապույտ, բորդո, դեղնավուն, բաց դարչնագույն) և գույներ զարդանախշի համար այնպես, որ համահունչ լինեն մեկը մյուսի հետ:

Ընտրած գունավոր թելը անցկացնում ենք հենքի թելերով մեկումեջ, գործիքով (պատառաքաղով, սանրով): նստեցնում, հետո հաջորդ շարքի համար նույն թելը անցկացնում ենք հակառակ մեկումեջերով և դարձյալ պատառաքաղով նստեցնում:

### **Կարպետի հյուսումն ըստ էսքիզի**

Կարպետի համար էսքիզը նպատակահարմար է նկարել վանդակավոր թղթի վրա՝ յուրաքանչյուր վանդակում նկարելով կա՛մ պայմանական նշան (օր.՝ x, o, /, +, դրանք հետագայում պետք է փոխարինել գույներով՝ ինչպես օրինակ x-կարմիր, o-կանաչ, /-կապույտ և այլն), կա՛մ արդեն նախապես որոշված գույն: Էսքիզը թղթին նկարելուց հետո հաշվում ենք վանդակների քանակը՝ յուրաքանչյուր վանդակի համար նախատեսելով որոշակի քանակությամբ թելեր (օր.՝ 1 վանդակը =3 կամ 4 թելի): Ի դեպ 2 թելից պակաս չենք կարող նախատեսել: Հաշվում ենք համապատասխան թելերի քանակն ըստ էսքիզի վանդակների և տեղադրում հինած շրջանակի վրա: Անպայման անհրաժեշտ է նախապես հաշվել, գտնել և ֆիքսել հինած թելերի մեջտեղը. եթե կենտ թվով են թելերը, ապա ֆիքսել 1 թել, եթե գույգ թվով են թելերը՝ 2 թել: Նախշը հարմար է տեղադրել և սկսել գործել մեջտեղից:

Մեկ այլ կարևոր խնդիր է գորգի, կարպետի և կարպետագործ իրերի լվացումը՝ դրանք կարող են՝ գունաթափվել, գույները խառնվել կամ խամրել:

Պետք է լվանալ նախապես փորձնական ստուգում անցկացնելով: Նախ պետք է գննել և որոշել, թե գործող թելերից որոնք են ներկված բնական և որոնք արհեստական ներկանյութերով, քանի որ բնական ներկանյութերը բավական կայուն են ջրի նկատմամբ, իսկ արհեստականները՝ ոչ:

Լվանալուց առաջ կարպետն անհրաժեշտ է մաքրել փոշեկուլով, եթե կան պատռված հատվածներ կամ անցքեր պետք է դրանք ամրացնել կոշտ բամբակյա կտորի կարկատաններով («բյագ»), որպեսզի լվանալիս դրանք էլ ավելի չվնասվեն:

**Մաս 3. «Կարպետագործություն» թեմայի դասի պլան**

Ուսուցիչ՝ Արմինե Հակոբյան

Հ. Հայրապետյանի անվան հ. 78 հիմնական դպրոց

<b>Առարկա</b>	Տեխնոլոգիա
<b>Դասարան և կիսամյակ</b>	6-րդ դասարան
<b>Թեմայի գլուխ և թեմա</b>	Կարպետագործություն
<b>Օգտագործվող նյութեր՝</b>	<u>Դասագիրք</u> <u>Տեսանյութ կարպետ գործելու մասին, պատմության մասին</u> թելեր, դազգահ, շրջանակ
<b>Դասի նպատակ</b>	<p><b><u>Ձևավորել</u></b></p> <ul style="list-style-type: none"> <li>• Խթանել հետաքրքրասիրությունը կարպետագործ իրերի նկատմամբ:</li> <li>• Հաղորդել գիտելիքներ կարպետագործության տեսակների մասին, ծանոթացնել կարպետահյուս իրերին:</li> <li>• Ծանոթացնել կարպետ գործելու համար անհրաժեշտ նյութերին, գործիքներին և հարմարանքներին:</li> <li>• Ծանոթացնել կարպետի զարդանախշի տեսակներին Սովորեցնել դազգահի վրա հինելու ձևերը:</li> </ul> <p><b><u>Զարգացնել հմտություններ</u></b></p> <ul style="list-style-type: none"> <li>• Սովորեցնել հենքաթելի վրա կարպետ հյուսելու պարզագույն տեխնիկան: Սովորեցնել հյուսել զոլավոր կարպետ:</li> <li>• Ձևավորել կարպետ հյուսելու կարողություններ:</li> <li>• Զարգացնել տարածական պատկերացումները կարպետագործության մասին, դաստիարակել հոգատար, ուշադիր և կոկիկ վերաբերմունք կատարած աշխատանքի նկատմամբ:</li> </ul> <p><b><u>Սոցիալական</u></b></p> <ul style="list-style-type: none"> <li>• մոտավոր և ճշգրիտ չափումներ կատարելու, արդյունքները գնահատելու կարողություններ,</li> <li>• սեփական տեսակետը հիմնավորելու և պաշտպանելու կարողություններ:</li> <li>• խմբում աշխատելու ունակություն,</li> <li>• միմյանց լսելու, օգնելու, խրախուսելու, արդյունավետ շփվելու հմտություններ</li> </ul>
<b>Վերջնարդյունքները</b>	<p><i>Նկարագրի կարպետագործության տեխնիկայի ընթացքը և կիրառի գործնականում:</i></p> <p><b><u>Գիտելիք</u></b></p> <p>1. Ի՞նչ հումք է օգտագործվում կարպետագործության մեջ:</p>

	<p>2. Ի՞նչ գործիքներ, սարքավորումներ է ստեղծել հայ ժողովուրդը կարպետներ գործելու նպատակով:</p> <p>3. Ի՞նչ գործիքներ են անհրաժեշտ բուրդը մշակելու համար:</p> <p>4. Ի՞նչ գիտես որդան կարմիր ներկանյութի մասին:</p> <p><b>Հմտություններ</b></p> <ul style="list-style-type: none"> <li>• կարողանա ընտրել թելեր կարպետի համար,</li> <li>• կարողանա հինել կարպետ,</li> <li>• կարողանա անվտանգ գործածել գործիքները:</li> </ul> <p><b>Վերաբերմունք</b></p> <ul style="list-style-type: none"> <li>• կարևորի սեփական ուժերով տվյալ թեմայի շրջանակներում հետազոտություն իրականացնելը,</li> <li>• կարևորի ժամանակն արդյունավետ օգտագործման հմտության զարգացումը,</li> <li>• կարևորի ինքնակրթության մեթոդների զարգացումը</li> </ul> <p><b>Արժեք</b></p> <ul style="list-style-type: none"> <li>• արժևորի ձեռք բերված գիտելիքների կիրառման դերը շրջապատող աշխարհում:</li> </ul>
<p><b>Դասի ընթացք/ ընտրված մեթոդ/ներ</b></p>	<p>ԽԻԿ համակարգ, խոսքային բացատրություն, ցուցադրում, ցուցումներ, հրահանգներ, Վենի դիագրամ, աքրոստիկոս, նյութն ամրապնդող զրույց , գործնական աշխատանք:</p>
<p><b>Կապը ՀՊԶ-ի հետ</b></p>	<p>Հ5 - կիրառի երկրաչափական պատկերների և մարմինների մասին գիտելիքներն ամենօրյա կյանքում և հարակից ուսումնական առարկաներն ուսումնասիրելիս,</p> <p>Հ26 - ցուցաբերի իր գործունեությունը պլանավորելու և ժամանակն արդյունավետ տնօրինելու կարողություններ,</p> <p>Հ28 - դրսևորի հետազոտելու, փորձարկելու, տարբեր գործիքակազմեր համադրելու կարողություն, ուրիշների հետ համատեղ կամ ինքնուրույն մշակի և իրականացնի նախագծեր,</p> <p>Հ30 - գտնի և օգտագործի տեղեկույթ տարբեր աղբյուրներից, որոշի և բնութագրի աղբյուրի արժանահավատությունը և այն օգտագործելիս կատարի հղումներ,</p> <p>Հ32 - արդյունավետ կազմակերպի իր ուսումնական գործընթացը և ավարտի աշխատանքներն առանց անմիջական վերահսկողության, կիրառի ինքնակրթության որոշ մեթոդներ,</p> <p>Հ46 - դրսևորի աշխատանքային հմտություններ, կարողանա հմուտ և անվտանգ օգտագործել տարբեր սարքեր, գործիքներ և նյութեր,</p> <p>Հ51 - կարողանա բացահայտել և զարգացնել իր հետաքրքրություններն ու նախասիրությունները և կատարել նախնական ինքնորոշում՝ հիմնվելով մասնագիտական կրթության հնարավորությունների վրա:</p>

## Եզրակացություններ և առաջարկություններ

Կատարելով այս հետազոտական աշխատանքը հանգում ենք հետևյալ եզրակացություններին՝

- Հայկական մշակութային համակարգի կարևոր ու ավանդական բնագավառների մեջ առանձնակի տեղ է զբաղեցնում գորգագործական մշակույթը:
- Գորգագործության ուսումնասիրությունը սովորողների մեջ ձևավորում է բարձր գեղագիտական ճաշակ, ստեղծագործական երևակայություն, պատմական գիտելիքների որոշակի պաշար և աշխատանքային հմտություններ:
- Տեխնոլոգիա առարկայի շրջանակներում դասավանդելով «Կարպետագործություն» թեման ուսուցիչը մեծապես նպաստում է աշակերտի մշակութային կարողունակության ձևավորմանը:
- Ունենալով համապատասխան գիտելիքներ և հմտություններ՝ աշակերտները հետագայում կներկայանան որպես հայ մշակույթի կրողներ՝ նպաստելով հայ մշակույթի պահպանման և տարածման գործին:

Գիտակցելով այն մեծ հոգևոր և ազգապահպան նշանակությունը, որն ունի մեր ժողովրդական դեկորատիվ-կիրառական արվեստը՝ մասնավորապես գորգագործությունն ու կարպետագործությունը, մենք մեզ վրա վերցնում ենք մեծ պատասխանատվություն ուսումնասիրել և տիրապետել դրանք գործելու տեխնիկային, ծանոթանալ մանկավարժության և հոգեբանության գաղտնիքներին, մեթոդներին, սկզբունքներին և արժանավոր կերպով փոխանցել կրտսեր սերնդին:

## Օգտագործված գրականության ցանկ

1. <https://www.arlis.am/DocumentView.aspx?DocID=77183>
2. Հանրակրթության պետական նոր չափորոշիչը (նոր մոտեցումներ, հեռանկարներ)  
Գ. Մելիքյան, Վ. Բրյուսովի անվան պետական համալսարանի «Լինգվա» հրատ., 2021թ.
3. Ս. Հովսեփյան, Ա. Հարությունյան, Մ. Աղաջանյան, Լ. Վերդյան, «Տեխնոլոգիա»  
հանրակրթական դպրոցի 7-րդ դասարանի դասագիրք Եր., Տիգրան Մեծ. 2016:
4. Ս. Հովսեփյան, Ա. Հարությունյան, Մ. Աղաջանյան, Լ. Վերդյան, «Տեխնոլոգիա» 5-7  
դասարանների ուսուցչի ձեռնարկ-Եր. Տիգրան Մեծ, 2014:
6. Ա. Հարությունյան, Ս. Հովսեփյան, Ժ. Ավետիսյան, «Տեխնոլոգիա» գործնական  
աշխատանքներ, 5-7 դասարաններ, Ուսուցչի ձեռնարկ, «ԱՍՏՂԻԿ ԳՐԱՏՈՒՆ»  
հրատարակչություն. Երևան, 2011:
7. Մ. Ղազարյան, «Հայկական գորգ», 1988թ., Երևան:
8. Տ. Իգիթյան, «Գորգերի արտադրության տեխնոլոգիան», 1952թ., Երևան:
9. Կ. Պապիկյան, «Հայկական կարպետներ և գորգեր», 2009թ., Երևան:
10. Հայաստանի պատմության թանգարան, «Հայկական գորգարվեստ», 2013թ., Երևան:
11. Ֆ. Գանցհորն «Քրիստոնեաարևելյան գորգը», 2013թ., Երևան: